

序

昔姚惜抱以理學名儒類纂古文辭主張後進海內翕然奉爲圭臬粵寇之亂厥學寢微吾師長沙祭酒惻焉而憂以學術之盛衰引爲有心世道君子之責於是裒采乾嘉道咸諸名人集按類編次續姚之書而所自爲各體古文一以姚氏宗旨爲歸而進求合乎先儒義理之學先生固不欲以文名而文必如先生乃可謂獨精者先生之言曰乾嘉鉅儒立漢學之名詆宋儒言義理爲不足述獨惜抱以義理攷據詞章三者不可一闕義理爲幹而後文有所附攷據有所歸故其爲文原流兼

賅粹然一出於醇雅夫先生於經史諸子

國朝掌故皆嘗鉤稽參訂著有成書固非不能以攷據名世而必若世之億離備霧襲取宋學爲高者然而其揚摧惜抱立言如此則先生之自任斯文實重且遠而所以探討義理發之於古文辭者皆吾黨小子所得而略言之矣嗚呼義理之說孟氏寔始言之其旨爲禮教所從出學者得之以不同乎雜家者言而自成其爲儒家言者也孟氏既往墨學未衰其徒黨又率能譬諭齊給捫爲名法捭闔諸姦說以蔑禮廢教曾惑愚衆故其文亦喬宇崑瑣而不可究詰荀卿子出論學論治悉本

乎禮反復推演綦明其趣於是其學爲千古修道立教
所莫能外而其文迺大醇而無所蔽近世已來士夫多
厭薄中庸務摭取荒徼異言著爲文說譎詢我政制經
典而謬謂能挾之敝其旤較戰國橫議爲烈先生獨能
主持正學放距褻詖俾其說不至深中乎風教先生之
引學術盛衰爲有心世道之責者毋乃在乎是然則先
生之文益不可不傳而先生之所發揮乎其文者良有
所本也毅受學先生有年知先生之學惟毅獨深每先
生一文出輒得先讀讀輒錄之積有歲年遂成巨帙亂
離旣肇人事日繁深恐師說之存於毅者或及身而散

失因與平江蘇厚康孝廉各出所錄若干篇仍謹依先生續古文辭類纂之例次第之都十五卷梓而行世毅生平不能文然偶有觸悟自謂能獲古文家傳授之宏旨嘗以所得質先生曰文而禮儒家言也文而非禮雜家言也先生深韙之今槩先生之文因臚舉已說引申師義而爲之敘後之讀先生文者幸其知所宗尙也光緒二十六年閏八月受業湘鄉陳毅謹敘

序

自來言古文者宗師昌黎夫昌黎之可師豈特其文之
格律氣韻云爾哉其進學解所稱列百家六藝細大靡
遺而答李胡書論文謂非三代兩漢之書不敢觀非聖
人之志不敢存又必識古書之正僞答李師錫則云所
志於古者不惟其詞之好好其道焉爾於序此昌黎文
之所以獨絕也宋世歐蘇輩出考其議論雖於古聖賢
有合有否要其生平志學各足自立故其文發之而特
光厯蠹晦而益顯

國朝桐城姚惜抱氏爲義理考據詞章合一之說藉以

融洽漢宋門戶定文章之趣嚮吾以謂考據以博古義理以明道此非姚氏之私言卽昌黎所自期與其教人爲文之旨端在於是然姚氏之文沈潛古籍於義理考據爲能兼綜其全故雖取法唐宋而能拔出一代彼世之號爲桐城派者吾惑焉夫必蓄於內者真而後發於外者有所不容已執持於己者大而後應於世者取給而不窮苟或抱其空質以鳴則雖體貌畢具若假良工之模以製器形狀僅肖精苦頓殊尙烏覩所爲宗派者乎舟楫者致遠之具而非所以致也規槩者造物之用而非所以造也體律者能文之方而非所以能也且夫

文之遞嬗無窮惟道與學之至者迺藉言語以存於不
敝偏畸於形貌未有能勝者也宋初鑒五代之纖麗而
柳穆以簡淡爲高明病臺閣之庸猥而王李輩號稱復
古援白嘲黑矯而仍敝笑足語文字之眞哉吾師葵園
祭酒曩曾賡續桐城纂次各家固亦循唐宋之軌轍而
其爲文醇懿槩鬱獨追古初奄有眾家之長遏而積之
挹秦漢之精而不掩其疏達之氣可謂極天下之智勇
祛文家之偏畸者蓋先生上自周秦兩漢之書下逮近
代掌故之錄罔不纂述成書既世之所推考據家復以
餘事發爲文章根底往籍抽析新理燦成統紀各還分

職斂焉而彌閔挹之而愈不盡又其衛道愛

國之誠縑繆方寸時見於意言之表真有合於昌黎所
云者若其考覈詳密源流畢賅遺字積語較量銖黍視
姚氏以下殆或過之已於庠滄瀛蘊亂絃誦將衰吾湘
昔日曾吳諸老相與切劘翕應於干戈顛沛之餘今漸
聞焉莫可復得重以邪說流行學校蒙殃文字之變與
世運殆無終極而先生獨抱古芳矯然物外後之讀斯
集者因益曉然於道範之不可踰越則所繫於風教者
尤鉅也輿受先生教有年於古人之道無所得唯於先
生文若有私嗜爰合先生舊作與同門諸子分類編刻

而序其悒以諭讀先生之文者光緒庚子閏八月平江
門人蘇輿敬撰

虛受堂文集目錄

卷一

科舉論上

科舉論下

海軍論

工商論

天地論

羣論

卷二

國史河渠志序

雲南鄉試錄後序

江西鄉試錄前序

浙江鄉試錄後序

東華錄序

東華續錄跋

天祿琳琅跋

皇清經解續編序

卷三

續古文辭類纂序

郡齋讀書志序

魏鄭公諫錄後序

曾子輯註序

談瀛錄序

葦野詩文合鈔序

衡陽陳氏譜序

梅全堂詩集序

壽梅山房詩存序

磨綺室詩存序

坦園詩存序

溶川詩鈔序

龐濬卿時義序

王氏塾課初編序

孫漁笙時文序

讀均軒館賦偶存序

國朝試律詩鈔序

師竹吟館詩存序

試韻舉隅序

書彭烈婦行狀後

書蘇東坡論范增後

卷四

劉氏傳忠錄序

宋劉屏山先生文集序

紫石泉山房文集序

集句訓子詩序

四書文函序

姓略序

重刊儒門法語序

楊丹山試藝序

劫餘廝存序

張乳伯文集序

汲古閣說文校勘記序

宗子相先生詩集序

存素堂彙刻經學叢書序

密菴自治官書序

重修泰興縣志序

卷五

堵文忠公集序

頻羅菴遺集序

金忠節公集序

代

重刊新安志序

代

畱雲山館文鈔序

思益堂集序

江左制義輯存序

南菁書院叢書序

礪東詩鈔序

麋園詩鈔序

詩餘偶鈔序

大學章句質疑後序

中庸章句質疑序

重刊世說新語序

周易集解纂疏序

荀子集解序

方言序

又代

查毅齋闡道集後序

讀禮叢鈔序

鹽鐵論後序

祁氏三世詩文集序

晚香堂賦鈔序

合校水經注序

滇詩重光集序

五塘詩草序

晚蘭齋文集序

養知書屋遺集序

重刊風憲約序

代

吳中丞游桃源洞記書後

梓湖文集序

瀏陽婁氏族譜序

卷六

心言序

清江雜錄
目錄
重刊南華九老會唱和詩譜序

莊子集釋序

釋名疏證補序

顧竹侯所著書序

葵園校士錄存序

韓非子集解序

今文尚書攷證序

漢書補注序

約章分類輯要序

丹溪全書序

文昌功過格序

重刊景教碑文紀事攷正序

又後序

日本源流考序

師範館講義序

輿誦錄存序

三田李氏譜序

宋梓儕詩集序

卷七

送何鏡海之官廣東序

送王夔石尙書序

贈楊性農先生重宴鹿鳴序

贈賴子佩大令之任邵陽序

劉靖臣制軍五十雙壽序

楊雲橋先生八十壽序

潘繹序之母梁氏七十壽序

朱少虞之母七十壽序

黃覲虞之母七十壽序

周慕陔七十雙壽序

叔母毛太恭人壽序

卷八

吏部左侍郎楊公傳

河南汝州知州楊公傳

梁剛節公傳

黃忠壯公傳

蔣果敏公家傳

贈知府銜署惠州海防通判高明縣知縣許公家

傳

皮先生家傳

龍孝子傳

張節母李孺人家傳

周宜人傳

章貞女傳

故明督師太傅大學士兵部尚書史忠正公傳

劉觀察傳

歐陽礪東先生傳

集句體

毛青垣先生傳

集句體

始祖子泉公傳

五世祖若水公傳

先伯兄會廷府君行狀

先仲兄敬吾府君行狀

季弟禮吾行狀

卷九

誥封榮祿大夫三品頂戴四品京堂郭公神道碑

提督銜陝西延綏鎮總兵官楊剛介公神道碑

惠州范公祠碑

太子太保陝甘總督世襲一等輕車都尉楊勇毅

公神道碑

兵部左侍郎郭公神道碑

江蘇巡撫黎文肅公神道碑

陝西忠義墓碑代

河南忠義墓碑代

誥授光祿大夫經筵講官工部尙書兼管順天府府尹事務祁文恪公神道碑

誥授光祿大夫貴州布政使李公神道碑

雲貴總督贈太子太保岑襄勤公神道碑

頭品頂戴陝西布政使贈內閣學士蔣公神道碑

誥授光祿大夫兵部左侍郎楊公神道碑

鑒欽差大臣辦理南洋通商事務兩江總督兼兩

淮鹽政江西巡撫兼提督銜李勤恪公神道碑

卷十

誥授資政大夫浙江嘉興府知府許公墓志銘

贈道銜候選同知直隸州知州湖北鄖陽府通判

周君墓志銘

江西候補知府李君墓志銘

閔浩齋先生墓志銘

周仲茗墓志銘

誥贈光祿大夫陳君墓志銘

誥贈中憲大夫楊君墓志銘

鹽城縣學生陳君墓志銘

誥贈中憲大夫吏部郎中加二級施君墓志銘

李爰得生礦志銘

布政使銜雲南按察使倉公墓志銘

誥授資政大夫安徽桐城馬踏石巡檢陸君墓志銘

江西進賢縣典史張君墓志銘

贈太子少保江西布政使陳公墓志銘

二品頂戴江蘇候補道郭君墓志銘

誥授朝議大夫湖南常寧縣知縣龍君墓志銘

卷十一

昆明布衣朵如璋妻劉氏墓志銘

姚訪梅妻張夫人墓志銘

張戊生妻趙恭人墓志銘

劉母張太夫人墓志銘

左母張夫人墓志銘

李母陸費夫人墓志銘

鮑母袁太恭人墓志銘

龔母沈太恭人墓志銘

伯母郭宜人墓志銘

嫂吳宜人墓志銘

姪女蘭儀壙銘

姪女媚祖壙銘

姪女鶴胎墳銘

女慰慈墳銘

長男榮祖墳銘

卷十二

劉秉齋墓表

張夫人墓表

代

誥封通議大夫五品銜國子監助教曾君墓表

誥授通奉大夫江蘇補用道李君墓表

翰林院編修陳君墓表

李徵君墓表

卷十三

金匱華氏新義莊記

代

向家衝先墓記

仙人市先墓記

重修寄園記

永慕廬記

江陰學使院續刻題名記

南菁沙田記

懷翼草廬記

捐建福尹二公祠記

水月禪林記

慕萊堂記

珠暉塔記

楓山致懋饗堂記

定香亭圖記

代

卷十四

祭張樹人文

祭閻潛邱先生文

春秋二仲祭閻先生文

湖南省城北門外新河祭水土神文

告大兄墓文

與朵生書

與王寶丞書

復閻季蓉書

丁次谷司馬壽頌

郭筠仙先生西法畫像序贊

家譜述贊

卷十五

駢文

張夫人誄

周夫人誄

十家四六文鈔序

徐騎省集序

代

駢文類纂序例

仁壽堂記

邊疆行役圖記

祭嫂楊宜人文

閻先生生日祭文

上胡筱泉師啟

與梁武卿書

卷十六

鮑太夫人年譜

王母鮑太夫人墓碑

以下附

郭嵩燾

王母鮑太夫人墓志銘

李慈銘

王母鮑太夫人墓表

周壽昌

永慕廬銘

郭嵩燾

王母鮑太夫人家傳

李楨

王母鮑太夫人像贊

楊恩壽

王母鮑太夫人誄

王闓運

又

袁昶

又

朱一新

又

繆祐孫

王母鮑太夫人壽言

附

趙銘

又

周材芳

又

馮一梅

又

繆荃孫

又

彭毓海

又

葉大焯

又

彭樹森

又

龍文彬

又

錢振常

虛受堂文集卷一

長沙 王先謙 益吾

科舉論上

光緒丁酉戊戌閒時文之敝極矣羣議變科舉法予亦韙之作科舉論上

一。統。之。天。下。之。士。以。制。藝。造。之。列。國。之。天。下。之。士。不。可。以。制。藝。造。之。今。之。世。論。海。內。則。一。統。合。環。球。爲。列。國。然。而。設。科。校。藝。儀。仍。前。政。用。時。文。取。士。而。罔。識。變。通。殆。未。挾。其。弊。也。自。宋。明。以。來。制。御。臣。下。之。道。既。得。倒。持。末。大。之。患。不。生。故。上。之。計。慮。惟。在。於。民。考。選。之。法。禁。約。之。方。

視唐世而遞加密俾士人搏心奮志求合有司饜其寵
榮不生佚志魁桀俛首而趨入吾彀椎愚者固知其無
能爲君上息偃於深宮而常有鞭笞萬里之勢然逮及
末造積弱勢成外侮憑陵羣熟視而無策爲下者雖有
忠義之氣手足如被桎梏徒瞋目張膽效死以殉前事
昭然可覩已所以然者知束縛其民之爲利而不暇計
及其民不足用之爲害狃於一成而不知變化以至此
也 國朝因明之舊鄉會試一場承用四書文二三場
爲經文爲策二百數十年中得人盛矣民之服事 國
家其收效與宋明無異也而 天子施德惠於民者積

之列而死蒙鄙儒之稱誰之咎也。況今之時文決裂橫潰其體已不能自立。昔人謂代聖賢立言者去之彌遠。吾爲士人議廢此者。專欲啗其精神。優其日力。多讀有用之書而已。若夫策論以存古文之學。則亦不能廢也。豈謂與制藝較優絀哉。難者曰。國家以制藝試人。皆讀四子書。四子書士人立身之根柢也。子不且以廢制藝者廢四子書乎。曰。奚爲其然也。用四書之題目易策論之體裁。如宋王安石始之作。雖廢猶不廢也。充之子史以博其趣。推之時務以觀其通。試不一題本末。賅貫使上下其議論而求才之道備焉。今也以時文爲

名而雜家後世之言紛然閒出幾不辨其爲何體以彼較此不猶愈乎難者曰是則然矣然國朝文試屢變先有性理論及表判矣乾隆二十二年去鄉試表判與會試俱用律詩四十七年移論二場改詩於一場文後旋去論不用今予以爲宜用策論策又三場所固有也存者疑於復重而去者不鄰於妄議乎曰性理之說有窮者也經史諸子時務無窮者也論無窮之與有窮固有間矣三場策近考據之文殿廷策取對揚之義視散文爲策抑又不同夫策論統詞耳合訂其章程而審思其損益有主者在非吾敢議也難者曰光緒乙亥合

肥李公有請廢制藝之疏予時典試江西爲鄉試錄序
以爲不必輕議而今自僭之邪曰吾前固云云矣所謂
不必輕議者非當時之急務也當時之要惟在商務海
軍事理至明吾詞非遁也今萬不得已而求轉機於異
日之人才吾亦非謂策論卽興起人才之本也思先避
制藝之害而已雖然以李公當日言之而吾不謂然也
又惡知吾言出不有人焉尙以爲不必然者邪

科舉論下

光緒戊戌夏奉 旨廢制藝試策論已而康有爲逆案事覺新政復舊作科舉論下

或曰甚哉論事之不可喜新也以 朝廷數百年之成法遵奉之唯恐或失一旦視若弁髦迺欲并制藝廢之亂黨之設心亦巧矣子非力攻亂黨者乎何立說之相似也予曰是未可以概論也夫康黨立心背畔議改制度以炫亂天下耳目其欲變衣冠更憲法斷不可行者也自我 朝開國以來官制非不時有損益彼既裁冗職復請設散卿自相違覆此大謬也至於制藝則豪雋

有志之士類不樂爲章句所困而庸庸者因之束書不觀人才消耗半由於此又其體實已滅裂羣激而爲廢之之言非亂黨之捫論彼攘其說以自鳴焉爾旣奉

旨廢去之天下之士喁喁然也今以亂黨倡言之故而復其舊則亦非吾輩所敢議矣曰子明制藝之害而未明其益聞天下之士之以廢爲樂而未聞其以爲苦也予曰制藝之益予固言之矣然必以人才興起之益專歸之四子書與制藝彼康有爲之徒皆習四子書由制藝出身者又何說也夫其心已悖亂雖日誦其文而精其技未見果有益也且所謂苦其廢者何曰以制藝試

貧士家有十千錢書可以成名易策論雖什倍於此而不足供周覽其不便實甚予曰子誠愛士將欲其多讀書以成才乎抑徒憫其貧而不思誘進之道也吾聞立政者以育才爲亟不聞敦學者以恤貧爲先子何論之卑也曰今科舉已復舊矣子言太切吾懼子且得罪予曰相時宜爲張弛者國家化成之妙也抒至言以備采擇者臣民獻納之誠也若子諛媚之詞則非吾所願聞也今天下所當究圖者甚眾徒各執其咫聞隅見膠固於心胸而莫能相發此人才所以日乏而世運所以不振也且制藝之宜更定舒赫德楊述曾言之於乾隆

時李相國言之於光緒初 朝廷雖不從未嘗加譴也
今之時誠急於舒赫德楊述曾李相國言事之時矣使
予而在高位視吾之言果有異於舒赫德楊述曾李相
國之言邪

海軍論

嗚呼。自海軍之興。迄今二十年。功既不成。而議論猶莫能相壹。吾是以歎中國之事。墮壞於浮言者多也。夫立事必有其本。謀慮是矣。慮遠則謀從而遠。慮短則謀從而短。凡事皆然。何況行軍。是故海軍之設。志在於戰。然後可守。未有志僅在守。而遂能自固者。矧張皇耳目。徒侈其名。志之不存。何有於守。且戰。或曰。子將率中國之人。而與外邦海戰乎。國家不勤遠略。此古聖之謨訓也。子豈未之聞乎。子曰。吾論其志。爾不必有其事也。今夫作室者。懼寇賊之警。則固其扃鍵。慮風雨之摧。則勤

其垣墉若興造未幾而傾毀隨之其謀之不臧決矣彼外邦所以教練其軍師摩厲其器械者舉可考見吾事取給外人苟且塗飾草具形模又羣以爲不急之務而訾笑之一旦有事乃責其不能爲一戰之用不亦遠於事情乎人之言曰兵可百年不用不可一日不備此世俗不通之論也天下豈有百年不用之兵哉果不用至於百年雖備猶不備也吾之爲兵日日如臨敵故慮密而神定寇至則藉以厲吾軍鋒而增益所未到是以士氣不竭而國威常張日本之效西法也海軍旣成試之於生番又試之於朝鮮可以悟其理矣當雄邦環

伺之秋縱不欲稱兵海上亦當思患於未然而儲材於不匱乃偃然自足不復爲深遠可恃之圖豈所謂善爲國者乎或曰海軍者外人之長技吾師其長適形其短奚爲其必取法乎棄瀕海地數十里深溝高壘以待之此制勝之策也予曰五方均是人也習貫自然豈眞彼長而此之短邪中國受列聖涵育物熾而豐瀕海皆民產誰能棄之且環海七千里而遙所棄多矣能必勝乎譬之一家然聞禦盜於戶外不聞招盜入室而鬪之也或曰如子言海軍其終不廢乎予曰今時事孔亟海澳形勝之區半爲敵據雖有海軍將焉置之而以空言

相持者。囂然未已也。自甲午日本之役。無事者且四年。此真國家閒暇之時。孟子與周公所兢兢致意者也。徒以籌償國責爲事。於所以固吾圉者。不一及焉。迺曰。吾自是不與外邦開釁。而人之環伺吾側者。則以爲彼志在通商耳。它非所圖也。噫。嘻。其果無它圖也邪。

工商論

工。與。商。之。相。需。也。猶。子。母。之。相。生。而。相。養。也。中。國。無。工。政。則。不。必。有。商。政。然。而。商。政。可。已。而。不。得。已。工。政。則。不。可。已。而。已。昔。在。成。周。之。世。工。商。並。任。而。工。之。爲。政。載。籍。特。詳。事。集。眾。長。故。官。府。之。董。勸。亟。焉。惟。技。巧。淫。奇。則。有。禁。王。道。所。以。居。正。也。今。之。工。推。泰。西。諸。國。就。其。中。析。言。之。輪。船。鐵。軌。地。球。一。統。之。舟。車。此。萬。古。不。廢。者。也。火。器。相。競。而。益。精。亦。軍。政。所。取。資。也。其。無。益。而。蠹。中。國。之。財。者。莫。如。飲。食。器。用。之。屬。彼。來。而。我。購。在。上。者。不。能。禁。也。於。是。有。南。北。洋。通。商。之。官。海。道。四。達。衢。市。閭。溢。愿。者。駭。

觀侈者競美輦去億萬而官取其毛釐蓋不數十年中
土之財將盡入於外邦雖欲不爲其奴僕牛馬而不可
得矣夫吾民非甚愚也公輸王爾之徒非絕迹於世也
貧賤無由集鉅貲而秀異不願能鄙事故非朝廷特
闢一進身之途又得悲天憫人之官長相與扶助獎成
之無望有工善其事之一日也或曰古聖之所禁而今
導之無乃不可乎曰非常之變蓋非常理所能制馭雖
古聖處今日其法不能不變也果工政爭勝外人則彼
之貨自沮而吾之財不流行之一省則保一省行之天
下則保天下富藏於民然後上之取不窮而事畢舉日

本其明驗已然則朝廷所以進之奈何曰宜倣唐百工伎巧領於少府監差其等以待能者庶幾其相勸乎雖然吾之私議云爾今之人言製造以火器爲先而工政與軍政不辨言變法以亂黨爲戒而忠謀與邪謀不辨視國計民生如秦越肥瘠之不相涉焉徒思快其口舌而不悟患之已迫於肌膚也可哀也夫

天地論

或曰古言天地合有諸曰奚爲其能合也然則何以有

開闢

春秋元命包云天地開闢至春秋獲麟之歲

曰此從其後言之耳非由

合而開之謂也清陽薄靡豈重濁之所能附著哉淮南

子言天先成而地後定何與曰天一成而不易故先地

有時而不定故後何以明其然也元黃既剖陰陽煦育

萬物森布人列其中物本無處不有人亦無乎不在西

書言先生物後生人先生植物而後生動物且推衍至

數千萬年之久然則物之萌芽於何啟人之種類又於

何蟄乎斯必無之理也卵形黃白球說權輿五洲既通

事歸實驗其虛懸而勿墜則氣之爲也陰陽之交不固或火焉而厭於飛灰或震焉而陷爲冰海其事備見於前史莊子云陰陽錯行則天地大絳地球傾覆之機必由於此其有子遺於山陬水澨者復相與出渾淪之中爲開闢之祖此可決知者也環球未通以前孰知其所終始今五洲和會已爲亘古不變之局彼洲沒則此洲記之矣或曰傾覆之災古有徵乎曰高僧傳云漢武穿昆明池底得黑灰後竺法蘭至人追問之蘭云世界終盡劫火洞燒此灰是也吾以此知之子遺之事有徵乎曰梁書云毗騫國王自古不死知將來事其子孫生死

如常人吾以此知之。

羣論

天下之大患曰羣。夫子言君子羣而不黨，明非君子而羣，必有黨而爲禍烈也。又言羣居終日，言不及義，明終日爲羣，弊必至是而不義之言，其害不可勝窮也。然則敬業樂羣，非與？曰：以業相羣，卽以文會友之義。唯敬故樂，否則殆矣。是故羣者，學之蠹也。且夫今古之人心，處常不靜之勢，三代邈矣。秦漢以還，往蹟可覩，明主在上，皆屈於宰制之具，一失馭而奮起競爭之局，成師之出不律，則囂市之聚無平。則閔唯羣故耳。人才者，國家之元氣也。養於學而後成國之爲學，貴中正平實。易知易

從足以共由而徧給庠序之內務令其氣常聚而勢常散措置苟或失宜忠信者失所馮依姦詭者據爲窟穴迨至中人以下爲異說所簧鼓羣之害成於學則人才喪其泰半雖誅鉏及之而元氣從此傷矣漢之世舉幡救鮑司隸者太學生上書頌王莽功德者亦太學生宋之世乞畱李綱衛社稷者三學生請賈似道督師者亦三學生好事一倡雲屬風靡徒取快意不問黑白然其聲氣足懾一時其議論足淆衆聰明季幾復社興遂以害政傾國羣之爲禍不尤昭然矣哉 國朝力懲前弊列聖以來以社會與朋黨二者爲世切戒故 朝野

清明爲往古所未有光緒初中朝士夫頗有清流品目朋黨萌芽焉賴天子聖仁旌別得宜消釋無迹至於學校諸生類能謹敕自守無復勝國囂張舊習迄今而奏牘上陳競稱社會若不知有前此禁令也者防之二百餘年而決之於一旦問何以故曰法外洋也然則大聖人渙羣元吉之訓尙不爲後代永法邪噫

虛受堂文集卷二

長沙 王先謙 益吾

國史河渠志序

自神禹作貢河不爲患七百餘載周定王時河徙漸失故道漢武帝元光中決瓠子注鉅野通淮泗自此河淮始通唐以前河北入海宋太宗時決溫縣滎澤頓邱泛澶淮曹濟諸州至彭城入淮神宗時分趨東南一合泗入淮一合沛入海河始奪淮沛道金明昌中北流絕而全河入淮矣元至元中開會通河通運道於是河運相維言治河必先保運明洪武初開濟甯西場場口引河

入泗濟運二十四年決原武至壽州正陽鎮入淮會通
河淤永樂九年濬河故道兼濬會通河改從南旺分水
遏汶北合漳衛遏泗南入沂淮漕事大定於是言通運
尤亟治河大抵有明二百餘年河屢徙決皆入淮其時
治河者或蓄淮敵黃或分黃導淮章疏迭陳功效互著
大旨歸於濟運然國用民力寢耗竭矣 國家定鼎燕
京歲漕東南粟供天庾淮黃運道致功尤急 世祖耆
定區宇卽 軫念河患遣大臣經理 聖祖神靈天縱
底績安瀾 世宗御極川瀆濬清黃沁以謐 高宗數
幸南服 駐蹕河干 親授方略同符 聖祖 仁宗

宣宗式續舊服永享成功 聖治光昭曠古所未有也咸豐以來河北行貫大清河入海以時方多故輓粟轉海以濟京畿而河工弗訖運道未暢論者有深憂焉臣維水道分合古今異宜至行水之法未有能外古聖人之意者亦順水之性而已黃淮合濟運當藉以爲資黃淮分濟運必籌所未備未至之患所宜豫防已然之迹不容終泥伏見乾隆中尙書孫嘉淦嵇璜先後請開減河導黃入大清河 命廷臣籌勘不行以河未北徙也臣意河未入大清河導使北行其勢難旣入大清河因而治之其事順今不可強而南猶昔不可強而北也

或者欲挽復淮徐故道。豈通論乎。當淮黃交匯時。揚豫
岌岌。列聖宵旰。區畫賢臣如靳輔。張鵬翮。齊蘇勒。嵇
曾筠。高斌輩。皆仰契廟謨。丕著成績。然潰決之事。往
往而有。高宗聞河勢北徙。喜動天顏。見之明諭。
可以知當時聖意矣。昔劉定公觀河。徂而歎禹德之
遠。今東南瀕水汙下之區。安田廬。樂生事。多不識當日
震驚漫溢爲何狀者。詎知國家聖聖相承。憂勤
孳畫。成允成功。有造於社稷民生者。如是其大且遠也。
爰述自順治以來二百餘年。訐謨切議。並著於篇。它
若海塘若永定河。若直省水利上煩。列聖咨儆二三

賢大臣修防疏浚之力者亦附載焉作河渠志

史館舊有河渠志彙訖於雍正八年光緒元年增修併黃淮運河爲一門張蘭軒同年編修清華任提調屬改爲此序時黃河入大清河未久間有潰決迄未大修至今日而工費之鉅什伯曩時矣足見事變之來非合全局而策其終始不可也光緒十二年正月自記

雲南鄉試錄後序

同治九年庚午

臣

先謙奉

命副

臣

汪敘璣往司滇試

既竣擇文尤雅者進呈

御覽

臣

謹稽首綴言簡末曰

自回民弗諱滇不舉鄉試十五年衣冠之士流離轉徙
厥身家之不皇恤壤地遼遠懷觀光利賓之誠而莫能
自致負餽擔簦走數千里與試於京兆者期不四十人
抱負瓌異蘊思醇粹之徒於邑慘廩終老戶牖不得階
尺寸者比比而是 皇上睠焉南顧實用矜恤旰食宵
衣申厲疆臣日求咸序悅欣之道督臣劉嶽昭撫臣岑
毓英宣德同力大龕蠹蛟屬戎事有閒亟以考官請蓋

自咸豐以來鋒鏑四集日月其稔天下率試不如期至
是滇閩與各直省同時並舉其殆天時之轉機而人文
之嘉會乎昔有虞之世苗民阻固禹益交贊七旬爰格
今茲回民無異苗類皇上治體遠規姚室疆吏思敷
文之功以贊神武之用使滇人知皇慶攸與求才
勸學如是其急然後士類之氣大伸而人心得所繫屬
柔回民桀驁之習而動以詩書冠帶之榮則干戈之災
不滌而自淨其裨益豈一手足之烈云爾哉自明楊慎
以古學倡於滇人知尊尙經術恭逢盛世右文益之
磨濯嘉道以還台衡踵武風流斯暢今以十數年不舉

之大典耆儒異等爭挾利器孟晉追羣景應而雲集

皇情延屬至切至殷甄拔之任責之臣等殫精窮晷思

勉厥職絜此多士對揚於廷宜有盛覽蘭茂其人應

期挺出爲邦家光是又臣區區之心所夙夜仰望者

矣

江西鄉試錄前序

皇上御極之元年舉行

恩科

命

臣

先謙偕副考官

臣

潘衍桐典江西試時監臨某官

臣

某等進學政

臣

某

所錄士局闈三試之

臣

與

臣

衍桐率同考官

臣

某等詳

慎去取得士如額擇其文尤雅者恭呈

御覽

臣

例得

臆言簡端

臣

維文與時爲變通而制藝取士前古莫尙

之良法也聖賢之微言奧理備於四子書學者正心修

身推而至於平天下舍是無由自朱子集論語注又從

禮記中摘大學中庸爲章句配以孟子題曰四書苟無

制藝則其書與諸子等耳上好刑名人師申韓崇虛無

入講莊老進詩賦人習潘謝曹馬以制藝取士四書命題然後斯世尊奉一致口復心研不能自己其智者隨所之而入道魯者緣習生悟亦能馴致義理之途達則窮事變充器識爲國家純臣窮抱遺經亦不失爲鄉里好修之士而科目出身仕途所重士雖兒齒宣髮皆思得一第爲榮束天下豪傑於追章琢句之中以柔其犷悍橫逸不馴之氣其爲功豈可一二數哉 國朝制藝設科實沿明舊康熙中改用論策後弊益甚仍復其初乾隆時舒赫德楊述曾等有更定文體之請卒從廷議而罷流及今日論者漸忘前事又激於風氣日卑復有

以制藝爲可廢者臣愚謂法屢更則國是紛敎不一則

民志惑我朝聖聖相承凡有勅垂極之細微無

不再三精審矧制科大典苟有可易豈待後來故今日
之要務在求才不在變法且寇亂以來勛臣半出科目

朝廷收制藝之效而未受其弊此其不必輕議斷可識

矣江西鴻生鉅儒炳鑠往代卽以制藝論王安石肇其

端文天祥備其體四雋五家暢其流談斯事者必用江

西爲稱首其人文章行誼咸卓然表見於世曷嘗爲制

藝掩邪我朝薰陶涵育二百餘載廬山贛水旁薄而

鬱積者宜必有發見焉以其時考之則可矣將復有魁

奇閎達者出以應。聖代文明之運乎。臣等忝與試事

甄拔必嚴選錄尤慎期以昭示先民矩矱此則職所當
勉者多士生長名邦果抗心前哲感奮興起不以制藝
自畫是。聖天子作人之澤也。臣與榮焉維時官斯土
者某某等例得備書

浙江鄉試錄後序

光緒二年丙子

臣

王先謙奉

命副

臣

潘斯濂典浙江

試事竣錄其尤進於

朝謹拜手稽首綴言簡末

臣

伏

覩

龍興之初秀水朱氏鄞縣萬氏諸人承明舊學用

文采彬雅倡於鄉二百餘年承流嚮風天下通材稱浙
最盛寇亂起咸豐初逾江湘穴金陵憑陵大吳以窺全
越郡邑殘破人文散失略盡矣然乙丑而後舉科凡六
每試應者萬餘得士數百奇才宿儒駢出其中美矣至
哉非夫 聖人之教涵濡薰習極深且久孰克致於斯
乎班固曰本吳越與楚接比數相并兼故民俗略同

臣

去歲奉 命典試江西其地古介吳楚之交而與越接人稟經術爲文善言名理今浙人之文藻繪論議迺或過之斯班氏之論爲不然與 臣愚以謂文章之道生於人心而成爲風俗周世十五國其地盡今齊晉秦豫數省犬牙相錯然方其分裂歌詩一出則審音者知爲何國之風屈原哀而楚以騷鳴相如奮而蜀以賦競若有方隅風氣之限而莫識所由然制藝之行於世久矣其所謂同異亦微矣然各行省之業此者父詔而師勉心慕而手追亦皆自爲風尙浙人出其含英咀華之餘力以蔚爲應舉之文其於江西之善是者並駕分馳爭能

而各極其勝。合則俗同。分則習異。亦古今之世變然也。
臣聞高宗朝訪求遺籍。浙中奏進著錄至數千百種。
上旣嘉此邦能讀書矣。巡幸東南。特命給帑繕
四庫全書。頒之浙。藏庋有閣。賜名文瀾。俾士子得就
近誦覽。然則今日陶染教澤。奮身著作之林者。烏可
不識所從來也。臣不敏於文事。無能爲役。敬述聖天子
栽培延企之盛心。及其鄉先正篤信好古。今昔人才
學術倚伏衰興之故。願與邦人士共勉焉。

東華錄序

臣聞天以佑民爲心。君以體天爲國。此理千古不易。自有中國以來。君臣陳戒。恆用是爲勸勉。至於實盡牧民之職。以仰承天休。丕基洪業。鞏若金城。當開國而已垂億萬禩之統。未有如我大清者也。自古歷世久而得天下者。莫如周忠厚。累積延祚八百。然昭穆之世。威靈侵替。殷東轍矣。炎漢以降。其君多以崛起草莽之際。踰爲一切。以幸天下。一再傳後。綱紀頽弛。陵替之漸。開變亂之端。作卽有享國。縣遠曾無百年。不遘內憂。外患。苟且枝柱。卒用顛危。所以然者。祖宗培植而未遑。子孫紹

述而不足恩澤不能深結人心而法復無以持其久也。明祖肇立百度號爲精密故其末季師喪財匱而國勢不傾然開拓之初誅戮安忍靖難兵興元氣剝喪仁厚之澤亦少竭焉萬厯以還綴旒在上延及天崇橫恣極於宦寺盜賊四起元元塗炭至於言路猖狂變亂國是君有權而不敢收臣有忠而不能效綱維蕩然國亦灰滅矣由是觀之爲治之道豈有他哉仁爲百姓留其有餘雖萬厚不以爲嫌法爲天下制其泰過卽一疏有所不可惟在人主謹持魁柄因事調劑以適其宜斯爲可大可久之業故曰徒善不足以爲政徒法不能以自行

此之謂也我太祖皇帝肇興東土無利天下之心因明臣召釁起兵復仇既定諸部破明兵取遼瀋遐邇懷畏遂建尊號用賢納諫崇儉黜奢嚴法令以肅羣情亟民事以崇本務締造伊始而治具畢恢屹然建萬世不拔之基爲帝太祖功莫隆焉太宗皇帝下朝鮮臣蒙古殘明取其城邑性不嗜殺感然以生民爲念命將出征每誡毋妄誅掠屢勝之後猶投書明主講和至數十次以善養人禁絕侵暴法不寬貴近恩無間疏遜雖未定中原而精神意量廓乎兼容并包萬流傾心規模宏遠爲帝太宗德莫懋焉世祖皇帝冲齡正位

因明運告終入關翦寇奄有九有親政以後制作聿新

延訪儒臣斟酌百代聖懷謙抑責躬之詔屢下迄於

晏駕未改厥初舉明季朋黨流風賦斂苛政一掃刮

絕與臣民更始俾溥海內外重覩天日所以爲帝世

祖聖祖皇帝天錫智勇幼卽以康乂天下爲心值三

孽不靖東南岌岌宸謨默運措寰宇於磐石之安闢

郡海島犁庭漠北危招羅刹就我皋牢躬上聖之姿

以好古敏求爲務誦讀講貫儒生無以踰其勤挽強命

中材武之士無能程其力凡有制作皆條理始終開扶

闡奧爲萬代法黜陟賞罰與天下爲公宮庭呼吸通

於窮巷 巡省河防屢勤鑿輅故能排羣疑而成不績

蠲租給復月不絕書 湛恩龐鴻浹民肌髓古稱令辟

若漢之文帝宋之仁宗不足以仰方 美備堯舜至矣

然洪荒簡陋可以清靜無爲治之如我朝民物之熾豐

疆域之廣遠有未易言就理者洵乎 聖祖爲書契以

來首出之 一人也及 皇躬不豫比戶祈禱 升遐

之日路祭巷哭徧於窮壤凡有血氣咸懷一心奉主之

誠雖云守成實兼開創所以爲 帝聖祖 世宗皇帝

始居潛藩獨立不倚 睿襟冲邈默契 天心唯 聖

祖爲能無憂唯 世宗不愧達孝旣續大統朝野欣慶

承六十年生息之後。慮天下習於縱弛。日揭示大義。以濯磨人心。自宗藩以至臣庶。始凜然守法。奉公永遵。蕩平正直之路。至於幘履閭閻。纖微必至。先聖後聖。若合符節。以唐虞執中之心。極文武張弛之用。所以爲

帝世宗 高宗皇帝仰紹 詒謀以育以正 天授

神武成。兩朝未竟之志。準同平而北。無漢世匈奴之患。金川定而西。無唐代吐蕃之擾。保世恢基。極於無外。鑑儲貳之失。定立賢之策。善繼善述。於斯爲盛。所以爲

帝高宗 仁宗皇帝以繼體授受 親承 訓政爲

曠代罕逢之盛逮 躬攬萬幾。首除煬蔽。三省邪民應

時平靖遂以寬仁慈恕鎮定海宇至於周歷陪都講武
木蘭昭示祖宗之大訓以垂戒方來孝思不匱自
來仁聖之君鮮能及者所以爲帝仁宗宣宗皇帝
養正青宮裁定大難踐阼後躬行節儉方物之貢裁
減大半務約己以養天下之和自抑以平天下之爭

遺訓昭垂欲舉配天祔廟鐫碑陳器諸大典及身
罷之聖不自聖之心度越萬世故廟爲清宣
宗文宗皇帝卽位嚴諭臣工滿除積習詔求才賢以
資弼亮羣下震動回易耳目值羣盜肆逆久未蕩平憂
憫黎元不遑安處海疆弗諡宵旰增勞成功未覩而

明識宏略任賢勿貳後來定亂諸臣皆拔自特達之知遂以經緯天地重就清晏故廟爲清文宗

穆宗皇帝稟兩宮懿訓再造區宇一人垂拱於

上百爾奔走於下中土旣平苗罔並戢自古中葉多故若晉室之隆卒保江東唐平安史遂階藩鎮跋扈之患皆以域中寇亂一蹶不振惟帝耆定偉烈爲方策冠將錫海內臣民以永永安集之福早棄天下弗究厥施至於今日哀慕之聲未已故廟爲清穆宗古之有國者英君誼辟恆不多觀殷商賢聖六七不皆有成續可稽詩美成康史言文景繼世者惡焉我朝

聖代興闢僅見推其指要亦曰盡教養之道而已

聖祖 高宗前後普免田賦數至億萬 列聖建元介

壽諸鉅典詔蠲逋賦亦動逾一二千萬當粵寇鴟張度
支告匱不聞有厲民之政視師者權商稅濟饒事過卽
詔停減江浙甫復永減漕額誠天地之至仁也 世

祖定律令除冤濫 聖祖每讞獄遲回慎重至再三常

以此意諭勉臣下 世宗 高宗 仁宗明罰敕法權

衡科律析及毫芒世守兢兢好生之德古無疇比 深
宮脩省止於至善自 朝達野在綱不紊羣臣士庶莫
不有當然之矩矱俾之率履以自納於理道之歸 心

法相承繼繩加密光天之下海隅蒼生咸憬然曰聖人愛我此其貽無疆之福式克至於今日休也與臣往誦蔣氏東華錄粗知梗概從事史館敬繹乾隆以次各朝爲續編病蔣氏簡略自天命迄雍正錄之加詳然後列聖圖治鴻模可循迹推求而得其精心所注刻既成謹颺言簡端用告後世治國聞者於虛讀是編而不感奮起立勉爲良吏民者非人也是則微臣區區纂輯之微意也已光緒十年歲次甲申閏五月

東華續錄跋

洪惟我 皇清光宅函夏 列聖續承 至德豐功度
越隆古 仁育義正海寓蒙福宜勒成書昭示萬禩凡
有血氣戴履 高厚遊息酣嬉幾忘 帝力紀載闕略
聽觀茫昧靡以宣 上德抒下情匪他人任實爲史臣
責 臣前見蔣良騏東華錄纂自 開國以來迄於雍正
頗具條理乾隆以後未聞續撰若 皇朝武功紀盛
聖武記嘯亭雜錄諸書於乾隆朝事實多所采摭至
微猷 鴻誥之垂貽典章名物之富美六十年中燦若
星列掇拾外漏咸所不免自非年經月緯難可尋究考

之往代以本朝國史編年捫自宋司馬光稽古錄厥後
作者約數十家李燾續資治通鑑長編明鄭曉吾學編
史裁特備而宋林駟皇鑑箋要取寶訓實錄國朝會要
爲注固知國史官書成資採錄體例斯存亦載筆之柯
則也伏讀乾隆二年五月 上諭曰向來 列祖實錄
聖訓告成之後皆藏之金匱石室廷臣罕得見者朕思
列祖聖訓謨烈昭垂不獨貽謀於子孫亦且示訓於
臣庶自應刊刻頒示俾人人知所法守用是有刊 五
朝聖訓之 命若乃 方略則例悉載 絲綸 寄諭
硃批並得宣示仰見 聖人示寰海以大公開臣庶

之蒙惑。釀恩厚意。隻古無兩。惜乎。欽定諸書頒賜。

有限。雖在士夫。無由徧覩。至於閭巷。彌絕闕仰。臣愚竊。

謂。本朝二百餘年來。所以陶冶羣倫。無微不至。故名。

臣者。碩項。背相望。而或服吏者。練法。而玩刑。業儒者。襲。

經。而市利。蘊孽。釀孽。戎生。伏莽。一旦潢池盜弄。鹿麕狻。

噬。杼柚告空。宵旰塵慮。竭天下之力。僅迺平之。而元。

氣休養。又需數十百年矣。雖天地之大物。不答施。豈德。

風偃草之效。有時或爽。毋亦。朝廷條教。不能戶喻。

彝訓之垂。與世推移。簡冊無稽。觀聽未洽。故致然歟。臣。

備員詞曹。編摩史館。亦頗究心。當世之務。痛斯民無知。

與所以報上德之未至仰體大聖人公天下之心
遠追前代李鄭述作近接蔣氏當日所錄凡登載論
旨恭輯聖訓方略編次日月稽合本紀實錄
制度沿革纂會典軍務奏摺取方略兼載御製詩
文旁稽大臣列傳成東華續錄一百二十卷乾隆一朝
政要大略具存不揣冒昧敬登梨棗欲得家置一編循
覽紬繹於以體聖訓而遵正直蕩平之路敬臣區區
之意實在於此嘉慶而下橐本麤具雍正以前錄視蔣
氏加詳將以次刊行焉時在光緒五年歲次己卯秋八
月

天祿琳琅跋

自古書用紙代竹帛美惡雜出隋世平陳存太建時書
爲古本別召工書者於祕書內補錄爲正副二本藏宮
中餘實祕書內外之閣厥後寫副又有上中下三品之
分此在當時鈔本中已寓鑒賞別擇之意唐末始鏤版
逮宋而盛太平興國間三館六庫書籍正副本八萬卷
見於青箱雜記史稱帝幸國子監閱庫書問經版幾何
邢昺對以國初不及四千今十餘萬版本大備以此知
館庫所藏亦皆版本自是目錄家網羅考訂紛然雜出
沿及元明刊摹愈廣將欲博覽遺書尤以精究版本爲

重矣。洪惟巨淸肇造區夏，列聖右文，遠邁古昔。

天府羣籍，富有日新。乾隆四十年乙未，命取內府藏

書，重加整比，敕編天祿琳琅書目十卷。越嘉慶二年

丁巳，以祕笈琅函，搜采彌夥，復輯後編二十卷。書都一

千六十三部。自宋迄明五朝舊籍，咸備旁羅。遠紹旣大，極無外而於棗印流傳之時地鑒賞採擇之源流並收。藏家生平事略圖記真僞研討弗遺，尤細破無內於版本嚴擇廣收而明末影宋鈔本並從甄錄。仰見聖學博大囊括萬有，足以津逮儒生，準繩百代而豈隋宋所能及哉。前編已入四庫提要，不及後編，以世無刊本。

罕獲觀者光緒七年於京師購得舊鈔攜歸長沙從弟
先泰見而驚喜願授之梓以公天下並假湘潭周氏鈔
本與湘潭胡元常王啟原善化劉鉅及從弟先豫精心
讐校刻既成謹綴言簡末以見聖代文治之隆及儒
者逢辰之幸爲前古所未有云光緒十年甲申閏五月

皇清經解續編序

國家稽古同天崇邁往牒 世祖臨御之初 御注孝
經頒示海內所以宏闡經術綱維人極復 命廷臣撰
易經通注折中古訓仰稟 睿裁 聖學精深開生民
所未有 列聖繼體炳焉同風 聖祖 世宗 高宗
三朝 欽定 御纂諸經揭日月而章雲漢於是海寓
承學之士憬然於 聖教所先羣以研經爲首務而又
殷本 庫書布在寰宇凡優游 盛世者咸得悉其
智能闚仰美富家續戶述流風益昌 本朝經學之隆
跨唐躡漢非夫 大聖人培植深而嘉惠厚其奚及此

易之賁貞離而悔。艮其象。辭曰觀乎人文以化成天下。而離之象。辭則曰重明以麗乎正。乃化成天下。夫人文者。化成之象也。然非重明麗正無以致之。唯我聖清當之矣。道光間前大學士臣阮元總督兩廣曾萃國朝學人撰著刊於粵東爲皇清經解千四百卷。邈

昭代之儒風導後進以繩矩。優優棣棣觀者美焉。今距粵東刊經之日踰六十年。中間寇難迭興。焚警相望。而率土人士內函貞固之氣。外炳文明之姿。所可安弦誦不輟。饗述之盛。視承平時抑無多讓。幸值神武書定。寰海鏡清。不於斯時哀集遺編。廣續刊布。懼彌久散。

佚曷以稱 聖天子勸學右文至意光緒十一年 臣奉

恩命視學江南抵任後檄學官覃心蒐采合 臣舊藏

掇其精要得書二百九部都千四百三十卷 奏請設

局刊刻經營三載工乃告成 臣自愧學術疏庸觀聽未

廣豈足以繼先 臣阮元之萬一惟是彙而存之以待後

善學者擇焉冀於 聖朝文治少有裨助竭 臣區區之

誠云爾光緒十四年歲次戊子夏六月